



COMUNICÂT STAMPE

27 di Fevrâr: la Zornade Furlane dai Dirits a Onde Furlane
Programazion speciâl siore di ospits e di sponsts pe riflession

Ai 27 di Fevrâr dal 1511 si invià il plui grant riviel popolâr furlan: un riviel che, massime tes campagnis, al cjapà sù un significât di rivendicazion dai “dirits antîcs” des comunitâts rurâls furlanis. Par cheste reson si à sielzût la date dai **27 di Fevrâr** par celebrâ la **Zornade Furlane dai Dirits**. Zaromai di cualchi an Radio Onde Furlane e ufrîs ta chê zornade une programazion speciâl che si propon di stiçâ la riflession sui dirits dai furlans e su lis bataiis in vore par difindiju.

La jentrade de Zornade e sarà curade di Mauro Missana, diretôr de emitente furlane, e di Carli Pup, quartevôs dal Comitât 482 che di passe dîs agns al è impegnât intal difindi I dirits linguistics e nazionâi des comunitâts dal Friûl, intant che Barbara Minen e proponarà une leture storiche dedicate ae rivolte furlane dal 1511.

Dilunc vie de buinore si fasarà il pont sul rispîet dai dirits des comunitâts slovene e todescje dal Friûl in grazie des intervistis cun **Luigia Negro** (presidente provinciâl de SKGZ) e **Velia Plozner** (componente de Comission regionâl pe minorance di lenghe todescje). Par chel che si riferîs ae situazion dai furlans, invezit, si proponarà un aprofondiment su la vicende de scuele di Migjee, câs evident di cemût che lis leçs su lis minorancis no son rispîetadis; di chest si fevelarà cul sindic di chest Comun dal Friûl orientâl, **Alberto Bergamin**.

Il toc centrâl de zornade, jenfri misdî e la une, al sarà po dedicât al teme dal lavôr e dai dirits dai lavoradôrs. Radio Onde Furlane a ‘nt fevelarà cun doi diviers aprofondiments, un su lis lotis pal lavôr intal Friûl di îr cuntune interviste di Adriano Venturini a **Guerrino Cecotti**, un dai protagoniscj des lotis dal Cormôr, e un altri dedicât ae situazion dal dì di vuê cuntune interviste fate di Lorenzo Fabbro al segretari gjenerâl de Cgil dal Friûl – Vignesie Julie, **Franco Belci**.

Vie pal dopodimisdî, invezit, a laran in onde i aprofondiments dedicâts aes bataiis pe difese dal teritori furlan e al dirit des comunitât locâls di decidi di bessolis dal lôr svilup. Par mieç di une schirie di intervistis curadis di Mauro Missana e Pauli Cantarut si fevelarà di TAV cun **Giancarlo Pastorutti** (Comitâts No TAV de Basse furlane), **di autostrade Cimpel–Secuals–Glemone cun Lucia D’Andrea** (Comitât ARCA), di eletrodor Redipulie–Udin cun **Aldevis Tibaldi** (Comitât pe vite dal Friûl rurâl) e dal progjet par dopleâ la centrâl idroelettriche di Somplât cun **Franceschino Barazzutti** (Comitât pe tutele des aghis dal bacin montan dal Tiliment).

Ai 27 di Fevrâr anje la programazion musicâl di Onde Furlane e sarà speciâl cul miôr de musiche furlane e di altris nazionalitâts minorizadis, e cun programs di pueste curâts di **Agnul Tomasin** (cu la sô storiche transmission *Gerovinyl*) e di Carli Pup (che al fevelarà invezit de “bande sonore” des rivoltis e des protestis che a àn scjassât il mont tal ultin an).

Buine scolte e buine *Zornade Furlane dai Dirits* a ducj.

Il diretôr di Radio Onde Furlane
Mauro Missana